



Broj: 01-50-1-15-23/07
Sarajevo, 18. 3. 2008. godine

Z A P I S N I K

23. sjednice Predstavničkog doma
Parlamentarne skupštine Bosne i Hercegovine,
održane 18.3. 2008. godine

Sjednica je počela u 10,10 sati. Prisustvovali su svi poslanici.

Iz Vijeća ministara BiH sjednici su prisustvovali predsjedavajući Nikola Špirić, ministri: Tarik Sadović, Slobodan Puhalac, Božo Ljubić, Sredoje Nović i Safet Halilović, te zamjenici ministara: Srđan Arnaut, Senad Šepić i Fuad Kasumović.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade, te nevladine organizacije Centara civilnih inicijativa.

U uvodnim napomenama predsjedavajući Živković dao je kratko obrazloženje prijedloga dnevnog reda 23. sjednice.

Prije otvaranja rasprave o prijedlogu dnevnog reda, predsjedavajući je podsjetio poslanike da im je 22. februara upućena inicijativa za osnivanje Nacionalne sekcije Globalne organizacije parlamentaraca u borbi protiv korupcije u BiH (GOPAC) i da su istovremeno pozvani da dostave svoje prijave za članstvo u ovoj sekciji, te da do sada nijedan poslanik to nije učinio. Izrazio je očekivanje da će se poslanici prijaviti, naglašavajući da su se iz Doma naroda već prijavila tri člana.

Predsjedavajući je podsjetio poslanike da je u toku priprema izmjena i dopuna Poslovnika Predstavničkog doma i da je Ad hoc komisija za pripremu izmjena i dopuna, kao i Prečišćenog teksta Poslovnika obavijestila Kolegij Doma da nijedan poslanik nije dostavio prijedloge ni sugestije u vezi sa izmjenama i dopunama Poslovnika. Pozvao je poslanike da se uključe u ovaj proces kako bi došli do što kvalitetnijih izmjena i dopuna Poslovnika Doma.

U vezi s prijedlogom dnevnog reda, predsjedavajući je zamolio poslanike da se suzdrže od prijedloga za dopunu predloženog dnevnog reda za 23. sjednicu, s obzirom na potrebu što bržeg donošenja odluke o izvještajima nadležne komisije o zakonskim prijedlozima o reformi policije, a da se eventualni prijedlozi mogu dati uz prijedlog dnevnog reda 24. sjednice, koja će se održati odmah nakon 23. sjednice Doma.

U raspravi o prijedlogu dnevnog reda Denis Bećirović predložio je da se u dnevni red sjednice uvrsti izjašnjavaње o inicijativi koju je podnio prije dvije sjednice, a koja se odnosi na usvajanje strategije za borbu protiv korupcije u Bosni i Hercegovini. Predložio je alternativu da se, ako nije moguće uvrstiti ovu tačku u dnevni red 23. sjednice, ona uvrsti u narednu kako bi se Dom o njoj izjasnio, jer su poslanici predmetnu inicijativu ranje dobili.

Vinko Zorić podsjetio je da se ova sjednica, kao i naredna, održavaju u Velikoj sedmici i da su svi vjernici katolici pristali da rade i na Veliki četvrtak zbog poznatih okolnosti, pa je u tom kontekstu zamolio sve poslanike da ovu i sljedeću sjednicu završimo što prije.

Nije bilo više rasprave o prijedlogu dnevnog reda.

Predsjedavajući Milorad Živković konstatirao je da 23. sjednica Predstavničkog doma ima sljedeći

DNEVNI RED

1. Usvajanje zapisnika 21. i 22. sjednice Predstavničkog doma;
2. Poslanička pitanja i odgovori;
3. Prijedlog zakona o nezavisnim i nadzornim tijelima policijske strukture BiH, sa Izvještajem Zajedničke komisije za odbranu i sigurnost;
4. Prijedlog zakona o Direkciji za koordinaciju policijskih tijela i agencijama za podršku policijskoj strukturi BiH, sa Izvještajem Zajedničke komisije za odbranu i sigurnost;
5. Prijedlog rezolucije o spremnosti Bosne i Hercegovine za NATO integracije (predlagači: poslanici Milorad Živković i Halid Genjac);
6. Davanje saglasnosti za ratifikaciju:
 - a) Sporazuma između Vijeća ministara BiH i vlada ostalih zemalja učesnica SEECP-a, Misije privremene uprave Ujedinjenih naroda na Kosovu, u ime Kosova, u skladu s Rezolucijom Vijeća sigurnosti Ujedinjenih naroda broj 1244,
 - b) Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju,
 - c) Druge izmjene i dopune Sporazuma o kreditu i finansiranju, od 23.11.2004., između Bosne i Hercegovine, Federacije Bosne i Hercegovine, Republike Srpske i Kreditanstalt für Wiederaufbau – Frankfurt na Majni "KfW" - Sanacija gradskih vodovoda i kanalizacionih sistema u Bosni i Hercegovini.

Ad. 1. Usvajanje zapisnika 21. i 22. sjednice Predstavničkog doma

Denis Bećirović je, u ime Kluba SDP-a, dao primjedbu na Zapisnik 22. sjednice, na dio koji se odnosi na raspravu o dva policijska zakona, rekavši da je navedeno da je u raspravi učestvovalo 26 poslanika, a u Zapisniku je navedena suština diskusije samo tri poslanika. Zbog toga je predložio da se Dom danas ne izjašnjava o ovom zapisniku, a da se Zapisnik doradi na način da se ili izvuče suština svih diskusija ili da se briše to što je navedeno iz diskusije trojice poslanika.

Prilikom glasanja, predsjedavajući Doma Milorad Živković konstatirao je da će se, uvažavajući primjedbu poslanika Bećirovića, Zapisnik 22. sjednice prilagoditi u skladu s članom 86. Poslovnika, navodeći samo imena onih koji su diskutirali, bez parafraziranja diskusija. Zatim je na glasanje dao Zapisnik 21. sjednice.

Zapisnik je usvojen jednoglasno – sa 41 glasom "za".

Zatim se Dom izjasnio o Zapisniku 22. sjednice.

I Zapisnik 22. sjednice usvojen je jednoglasno – sa 41 glasom "za".

Ad. 2. Poslanička pitanja i odgovori

Predsjedavajući Živković konstatirao da su odgovore za ovu sjednicu dobili poslanici:

- Niko Lozančić – na dva pitanja, Husein Nanić – na dva pitanja, Sadik Bahtić, Velimir Jukić, Azra Alajbegović i Sefer Halilović - na pitanja postavljena na 18. sjednici;
- Husein Nanić i Selim Bešlagić – od Vijeća ministara BiH na pitanja postavljena na 19. sjednici;
- Lazar Prodanović, Sadik Bahtić, Selim Bešlagić, Velimir Jukić, Sead Jamakosmanović, Azra Alajbegović – na dva pitanja, Šemsudin Mehmedović – na dva pitanja, Rifat Dolić - na tri pitanja, Denis Bećirović – na dva pitanja, Savo Erić, Slavko Matić i Remzija Kadrić – od Vijeća ministara BiH na pitanja postavljena na 20. sjednici;
- Sead Jamakosmanović od Ministarstva vanjskih poslova BiH na pitanje postavljeno na 20. sjednici;
- Lazar Prodanović od Ministarstva vanjskih poslova na pitanje postavljeno na 21. sjednici;
- Sead Jamakosmanović od Državne komisije za reviziju odluka o naturalizaciji stranih državljana – na pitanje postavljeno na 21. sjednici;
- Denis Bećirović dobio je od Vijeća ministara BiH odgovor na pitanje postavljeno za Prvu posebnu sjednicu oba doma.

Odgovore na pitanja komentirali su poslanici: Rifat Dolić, Selim Bešliagić, Husein Nanić, Velimir Jukić, Sefer Halilović, Lazar Prodanović i Sead Jamakosmanović.

Pitanja su obnovili:

- Rifat Dolić – pitanje postavljeno ministru odbrane na 20. sjednici u vezi s obespravljanjem ljudi u Minitarstvu odbrane u Velikoj Kladuši;
- Selim Bešliagić - pitanje postavljeno na 19. sjednici u vezi s nastavkom Rimskog puta;
- Husein Nanić - pitanje postavljeno na 19. sjednici u vezi s problemima građana koji su izgubili posao u Općini Tomislavgrad;
- Slavko Jovičić - ponovio je pitanje koje je postavio na 5. sjednici, a koje se odnosi na nacionalnu strukturu zaposlenih u institucijama Bosne i Hercegovine.

U okviru komentara Remzija Kadrić podsjetio je da je postavio više pitanja i da ni na jedno još nije dobio odgovor, te poručio onima kojima je postavio pitanja da očekuje odgovor i unaprijed im se zahvalio.

Postavljena su sljedeća poslanička pitanja:

Sadik Ahmetović:

„Da li je tačno i ako jeste, onda kako je to moguće da se, po zahtjevu Srbije, proganjaju građani Srebrenice – žrtve genocida i pokušavaju privesti pred sudove u Beogradu? Šta radi Vijeće ministara BiH da zaštiti svoje građane? Tražim oštar protest ove države, na sve važne adrese (UN, Evropska komisija, Brisel i slično).“

Šemsudin Mehmedović:

„1) Na kojim članovima Poslovnika i Zakona o komunikacijama je zasnovan stav Zajedničkog kolegija oba doma?

- 2) Kako je uopće moguće donijeti tako važan stav bez predstavnika jednog naroda?
- 3) Zašto na Zajedničkom kolegiju nije konkretizirano u čemu Savjet Agencije nije ispoštovao Zakon o komunikacijama?
- 4) Da li se pod nepoštivanjem Zakona podrazumijeva neizvršavanje naloga Vijeća ministara BiH i u kojoj mjeri je doneseni Zaključak u skladu sa Zakonom o komunikacijama?
- 5) Da li Zakon o komunikacijama uopće dopušta bilo kakve intervencije Vijeća ministara BiH u proceduri izbora generalnog direktora ili su one isključene statusom RAK-a kao nezavisnog regulatornog tijela?
- 6) Da li je Vijeće ministara BiH uopće razmatralo da li izabrani kandidat za generalnog direktora RAK-a ispunjava zakonske uslove?
- 7) Zašto je Vijeće ministara BiH razmatralo Prijedlog odluke ako se naknadno tvrdi da dostavljeni materijal nije bio potpun? Zašto nije postupilo po Poslovniku i po Zakonu o Vijeću ministara BiH, prema kojim se nekompletni materijali i ne stavljaju ili se skidaju s dnevnog reda, uz određivanje roka za njihovo kompletiranje?
- 8) Da li je donesenim zaključkom Vijeće ministara BiH prekoračilo granice svojih ovlaštenja i uzurpiralo zakonska ovlaštenja Savjeta Agencije, te samim tim prekršilo Zakon o komunikacijama?
- 9) Da li se stavom Zajedničkog kolegija kojim je podržan Zaključak Vijeća ministara BiH, bez prethodnog utvrđivanja njegove osnovanosti i zakonitosti, tolerira kršenje Zakona o komunikacijama i osnovnih principa nezavisnosti RAK-a?
- 10) Da li je ovakvo postupanje u skladu sa zaključcima sa sastanaka za praćenje reformskih procesa (RPM) na kojima se insistira na važnosti očuvanja nezavisnog statusa RAK-a, što je posebno naglašeno na sastanku održanom 20.2.2008., na kojem se ovo pitanje razmatralo kao posebna tačka dnevnog reda?“

Zlatko Lagumdžija:

„Ukoliko je tačno da sam ja ili bilo ko drugi bio nalagodavac za bilo kakav lažni račun ili zloupotrebu pri korištenju računa u ime Vlade RBiH, ovim pozivam **Tužilaštvo BiH** da bez odgađanja provede istragu i najoštrije kazni onoga ko je to bilo kada uradio.“

Tražim od **Vijeća ministara BiH, odnosno ministra finansija i ministra sigurnosti** da daju punu informaciju o tome da li su računi na koje se mediji pozivaju, ili bilo koji drugi, od 1992. godine do danas, računi Vlade RBiH ili Zlatka Lagumdžije ili bilo koga ko ih je zloupotrijebio.

Tražim odgovor na pitanje ko je i za koje potrebe otvarao ove račune, koliko i od koga je sredstava na njih leglo, za šta i kada su sredstva upotrijebljena te ko su bili nalogodavci za isplate po ovim računima.

Također tražim da odgovorite da li je ovim računima, ili bilo kojim drugim te vrste, raspolagao Zlatko Lagumdžija te, ukoliko je to tačno, na koji način se to desilo.

Ovo pitanje pred Parlamentarnom skupštinom BiH možete smatrati i mojim ovlaštenjem ministru finansija i ministru sigurnosti da bilo gdje u zemlji i svijetu provjere bilo koji račun pod mojim imenom, ako je to potrebno.

Tražim da se o ovome javnost u cijelosti i istinito informira a u prilogu Vam dajem podatke o računima koji su bili predmet natpisa i izjava na osnovu kojih prosljeđujem ovo poslaničko pitanje.“

Sadik Bahtić:

„Tražim da mi se dostavi nacionalna struktura državnih službenika zaposlenih u institucijama Bosne i Hercegovine (Vijeće ministara BiH, Predsjedništvo BiH, agencije, direkcije i svi oni koji se finansiraju iz budžeta BiH).“

„Tražim od Vijeća ministara BiH da mi odgovori da li je tačno da je poslanik Zlatko Lagumdžija dao ovlaštenje u ratu da se prikupljaju sredstva po zapadu i Evropi, da li postoji taj pečat i ta ovlaštenja i koliko je novca prikupljeno na račun.“

Husein Nanić:

„U sredstvima informiranja može se saznati o aktivnostima koje vode Vijeće ministara BiH i entitetske vlade o izgradnji putne infrastrukture-autoputeva u Bosni i Hercegovini. Dio teritorije BiH, tj. Unsko-sanski kanton u svim tim planovima kao i da ne postoji, tako da planovi federalne vlade završavaju s Donjim Vakufom ili, u najboljem slučaju, s Jajcem a planovi Vlade RS-a s Prijedorom. Kao poslanik iz te izborne jedinice, moram izraziti svoje neslaganje s takvim načinom rada a to ima posljedice da je nama Krajišnicima vremenski bliže Beč, a kako vrijeme prolazi, već nam je bliže i Minhen.

Pitam ministra - da li je i kako planirano povezivanje Unsko-sanskog i Livanjskog kantona sa ostatkom države?“

Selim Bešlić:

„U kojoj je proceduralnoj fazi Zakon o zaštiti i dobrobiti životinja?“

Momčilo Novaković:

„Kada će granični prijelaz Donja Gradina biti u funkciji za teretni saobraćaj i koji su razlozi što do sada nije stavljen u funkciju?“

Jozo Križanović:

„ Odlukom CIK-a, od 17.1.2008., objavljenom u „Službenom glasniku BiH“, od 4.2.2008., stavljeno je van snage Uputstvo za primjenu Zakona o sukobu interesa u institucijama vlasti BiH. Povodom toga tražim odgovor na sljedeća pitanja:

- 1) Da li je CIK donio novo uputstvo za primjenu ovog zakona?
- 2) Da li je stavljanjem van snage ovog uputstva CIK ukinuo važnost ovog zakona i praćenje njegove primjene i na nivou entiteta?“

Snježana Rajilić:

„Kad će se vršiti dokategorizacija graničnih prijelaza između Republike Hrvatske i Bosne i Hercegovine? Ovdje, prije svega, mislim na granične prijelaze od Novog Grada do Gradiške. Također me zanima da li je moguće otvaranje novog graničnog prijelaza kod Martinbroda kako vozači i pješaci ne bi prelazili i do 25 km u jednom pravcu da pređu granicu između R Hrvatske i BiH.“

Velimir Jukić:

„Ubrzati sve potrebne aktivnosti na izradi Zakona o carinskoj tarifi BiH (ili izmjena i dopuna postojećeg predmetnog zakona).“

Rifat Dolić:

1., „Molim da mi se u pismenoj formi dostave podaci o visini plaća direktora i visini naknada predsjednika i članova Nadzornih odbora u ustanovama, agencijama i drugim vladinim institucijama nad kojima ingerencije ima Vijeće ministara BiH i država Bosna i Hercegovina.“

2., „Koliki je broj neriješenih predmeta u svim sudovima u BiH, kakva je njihova predmetna i teritorijalna struktura, kakav je odnos tog broja neriješenih predmeta u odnosu na broj neriješenih predmeta prije pet ili šest godina, odnosno prije početka reformi u pravosuđu BiH i šta se namjerava preduzeti da se broj neriješenih predmeta sudova u BiH svede u normalne okvire?“

Mehmed Suljanović:

„U kojoj fazi se nalazi izrada zakona o državnoj pomoći?“

Denis Bećirović (inicijativa):

„U namjeri da pokrene borbu protiv upotrebe jezika mržnje, rasizma, ksenofobije, antisemitizma, šovinizma i svakog drugog oblika raspirivanja netolerancije i ekstremističkih pogleda, a s ciljem sprečavanja i širenja najmračnijih naci-fašističkih ideologija i pojava, Predstavnički dom Parlamentarne skupštine BiH usvaja inicijativu kojom zadužuje Vijeće ministara BiH da izradi i Parlamentarnoj skupštini BiH dostavi tekst zakona o zabrani svih neofašističkih organizacija i upotrebe njihovih simbola, uključujući zabranu ustaških i četničkih organizacija, kao i onih koje se naslanjaju na tradiciju Handžar divizije. Rok za dostavljanje zakona u parlamentarnu proceduru je najkasnije šest mjeseci od dana usvajanja navedene inicijative.“

Postavio je pitanje Kolegiju Doma:

„Zašto nema TV prijenosa sjednica Predstavničkog doma Parlamentarne skupštine BiH kada smo svi, dakle, jednoglasno u Predstavničkom domu donijeli zaključak da uvedemo taj prijenos?“

Sefer Halilović:

„Da se ispituju svi računi koji su otvoreni u ime Republike BiH, ko su bili potpisnici, koliko je novca prikupljeno i šta je sudbina, odnosno kako je potrošen taj novac?“

(Za Kolegij Predstavničkog doma – predsjedavajućem Miloradu Živkoviću):

„Kada ćete osigurati direktan TV prijenos sjednica ovog visokog doma?“

Predsjedavajući Živković je na sjednici odgovorio na ovo pitanje.

Drago Kalabić:

„Da li je i kada podignuta optužnica za ubistvo Mileta Nastića u Prnjavoru 1995. godine? A ako nije, ko su bili istražni sudija i tužilac u tom slučaju, na kojim funkcijama se danas nalaze te kakvo je obrazloženje za nepodizanje optužnice?“

Jerko Ivanković Lijanović:

„Da li je moguće da BHRT prenosi sjednice Predstavničkog doma od 10 do 16 ili 17 sati ukoliko termin održavanja sjednice dobijete sedam dana prije njenog održavanja kako bi mogli planirati ostali dio programa?“

Ad. 3. Prijedlog zakona o nezavisnim i nadzornim tijelima policijske strukture BiH, sa Izvještajem Zajedničke komisije za odbranu i sigurnost i

Ad .4. Prijedlog zakona o Direkciji za koordinaciju policijskih tijela i agencijama za podršku policijskoj strukturi BiH, sa Izvještajem Zajedničke komisije za odbranu i sigurnost

U uvodnim napomenama predsjedavajući je podsjetio da je Zajednička komisija za odbranu i sigurnost dostavila negativne izvještaje o prijedlozima zakona iz 3. i 4. tačke i da se na Domu raspravlja i odlučuje o izvještajima Komisije. Predložio je da se vodi jedinstvena rasprava o ovim tačkama dnevnog reda.

U okviru ovih tačaka u raspravi i replikama učestvovali su: Rifat Dolić, Azra Hadžiahmetović, Vinko Zorić, Branko Dokić, Selim Bešliagić, Milica Marković, Hadži Jovan Mitrović, Niko Lozančić, Momčilo Novaković, Jozo Križanović, Sadik Bahtić, predsjedavajući Vijeća ministara BiH Nikola Špirić, Zlatko Lagumdžija, Slavko Jovičić, Drago Kalabić, Ekrem Ajanović, Bakir Izetbegović, Mirko Okolić, Denis Bećirović, Salko Sokolović, Sefer Halilović i Husein Nanić.

Prilikom glasanja predsjedavajući Živković napomenuo je da će se Dom izjasniti o izvještajima, a zatim o zaključcima koje je predložio Niko Lozančić, koji imaju smisla ukoliko prijedloge zakona Dom vrati Komisiji na ponovno razmatranje i dostavljanje novog izvještaja. Zatim se pristupilo glasanju.

"Za" Izvještaj Komisije za Prijedlog zakona iz 3. tačke glasalo je 19, a "protiv" 22 poslanika. "Suzdržanih" nije bilo.

"Za" Izvještaj Komisije za Prijedlog zakona iz 4. tačke glasalo je 17, "protiv" 23, a "suzdržana" su bila dva poslanika.

Predsjedavajući je konstatirao da nisu usvojeni izvještaji Zajedničke komisije za odbranu i sigurnost za prijedloge zakona iz 3. i 4. tačke. Zatim je pozvao Dom da se izjasni o prijedlogu zaključaka koje je predložio Niko Lozančić.

O zaključcima kraće su raspravljali Martin Raguž i Jozo Križanović.

Sa 22 glasa "za" (Federacija BiH 13, RS devet), 10 "protiv" i 10 "suzdržanih", usvojeni su sljedeći zaključci:

1. Predstavnički dom Parlamentarne skupštine BiH ne prihvata izvještaje Zajedničke komisije za odbranu i sigurnost o Prijedlogu zakona o nezavisnim i nadzornim tijelima policijske strukture BiH i Prijedlogu zakona o Direkciji za koordinaciju policijskih tijela i o agencijama za podršku policijskoj strukturi BiH.
2. Predstavnički dom Parlamentarne skupštine BiH traži od iste komisije izradu novih izvještaja u roku ne dužem od 48 sati, te da pri tome ima u vidu sve rasprave o izvještajima i ulozenim amandmanima.
3. Raspravu i odlučivanje o izvještajima i prijedlozima zakona Predstavnički dom Parlamentarne skupštine BiH obaviti će u roku ne dužem od 48 sati.

Ad .5. Prijedlog rezolucije o spremnosti Bosne i Hercegovine za NATO integracije (predlagači: poslanici Milorad Živković i Halid Genjac)

U uvodnim napomenama predsjedavajući Živković podsjetio je na Izvještaj nadležne Zajedničke komisije za odbranu i sigurnost i na amandmane koji su usvojeni u Komisiji uz saglasnost predlagača.

U raspravi su učestvovali: Momčilo Novaković, Denis Bećirović, Milica Marković, Šefik Džaferović, Milorad Živković, Selim Bešliagić Jozo Križanović, Drago Kalabić, Mirko Okolić i Halid Genjac.

Amandmane na Prijedlog rezolucije podnijeli su Momčilo Novaković i Denis Bećirović.

Prilikom glasanja nisu usvojeni amandmani.

- "Za" amandman Novakovića glasalo je 15, "protiv" 22, "suzdržalo" se pet poslanika.
- "Za" amandman Bećirovića glasalo je 17 (Federacija BiH 16, RS jedan), "protiv" 12, "suzdržalo" se 12. Nakon usaglašavanja u Kolegiju kao komisiji, izvršen je drugi krug glasanja, kada je iz Republike Srpske "protiv" amandmana glasalo 12 poslanika, što je više od dvije trećine iz entiteta.

Poslije glasanja o amandmanima Dom je, sa 38 glasova "za" (Federacija BiH 28, RS 10) i tri "suzdržana", usvojio Rezoluciju o spremnosti Bosne i Hercegovine za NATO integracije, s amandmanima sadržanim u Izvještaju nadležne komisije.

Ad . 6. Davanje saglasnosti za ratifikaciju:

- a) Sporazuma između Vijeća ministara BiH i vlada ostalih zemalja učesnica SEECP-a, Misije privremene uprave Ujedinjenih naroda na Kosovu, u ime Kosova, u skladu s Rezolucijom Vijeća sigurnosti Ujedinjenih naroda broj 1244,
- b) Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju,
- c) Druge izmjene i dopune Sporazuma o kreditu i finansiranju, od 23.11.2004., između Bosne i Hercegovine, Federacije Bosne i Hercegovine, Republike Srpske i Kreditanstalt für Wiederaufbau – Frankfurt na Majni "KfW" - Sanacija gradskih vodovoda i kanalizacionih sistema u Bosni i Hercegovini.

U okviru ove tačke diskutirali su: Niko Lozančić, Slavko Jovičić i Velimir Jukić.

Poslije rasprave, Dom je dao saglasnost za ratifikaciju ovih akata, sa sljedećim rezultatima glasanja:

Sporazum pod a) – "za" glasalo 40 (Federacija BiH 27, RS 13), "suzdržan" jedan;

Sporazum pod b) – "za" glasalo 39 (Federacija BiH 26, RS 13), "protiv" jedan, "suzdržan" jedan i

Sporazum pod c) – "za" glasalo 37 (Federacija BiH 24, RS 13), "protiv" dva, "suzdržan" jedan poslanik.

Sjednica je završena je u 15 sati.

Sastavni dio Zapisnika je transkript 23. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković